



Myr gseen, wie ein in Ryy dryy gheit
und nach em Rettigsring lut schreyt
myr finde e roote, aber kai wysse
drum löhn mr en schreye und gniesse d Kulisse

Dr Bundesroot isch scho zem Gruuse
e jeede Schuss goot hinde uuse
s sin siibe Knöpf, statt siibe Schalter
drei Blätz-, ei Burk-, drei Büstehalter

Myr wisse, z Bäärn in Bääregraabe
doo traue sich nur Spinner aabe
dr EHC will als Hai goo gwinne
doch s kömme nit e mool die, wo spinne

Deert fünf Fliigel, do nynn Bai
fuffzää Aier, gedailt duur zwai
s isch nit dr Fink bim Team Uffstelle
s sin Ziircher bim Flamingo zelle

E Gritte frogt dr Berlusconi
wotsch du lieber mit oder ohni?
wo si ihn gseht, danggt si, jä guet
do längt jo au e Fingerhuet

Männgmool fäält's em Gass an Grips
als Schuggerchef nimmt äär dr Lips
myr Baasler schleent nit graad Alarm
doch mit Ziircher wäärde mir, nie waarm

D Morin sait: "Das isch nit woor
dä Hebel gyts nit scho so vyyl Joor
my Soon leert näämmli eerscht graad jetz
in dr Schuel neu s Hebel-Gsetz

Al Dschasira brichte ganz versteert
„In Basel toll - ha dr Arabi gheert“
Si mäldedruuff halb duredrillt
Au d Männer sin do ganz verhillt

Zem suffe dinn isch d BaZ jetz, broscht
us digger Boscht wird Maagerkoscht
zem Gligg bruuchsich glyych no zwai, drei Stunde
denn hesch au dr Sportdail gfunde

D Hingis duet jetz uff em Rössli rytte
ob sys ka wänn mir nit bestritte
bim Interview mein sy ganz unverfroore
prrrrr..... myr hän halt verloore

www.alperöösl.ch

E Bangg vo dr



Wottsich au by uns bänggle?
Schigg doch aifacht e Brief in unser Boschtfach
VSG Postfach 4365
4002 Basel
Oder goosch uff
www.vsg-basel.ch
